

遊將軍洞詩序

明童覺

夫山水與人相資柳州記馬退山茅亭云美不自美
因人而彰蘭亭不遭右軍則清湍修竹蕪沒於空山
矣又云是山僻介遐裔佳境罕到不有所作使盛蹟
鬱湮是貽林間之媿蓋皆有慨乎其言馬茲意也今
乃於吾永將軍洞得之洞在衛城北七八里國朝二
百年來僅相沿有其名竟無一訪探者丙戌夏余偶
過此樵人導之往下危岑越曲澗躡蹬攀藤披剔荆
棘以達洞門門上綠蘿紛纏野花簌簌落滿人肩背
進不數武頓覺涼沁心脾衣帶皆疎爽仰視石乳倒

續修永定縣志

卷之十一 藝文序

一

垂長至丈許偶一磬欬四壁響應蝙蝠撲面飛出不
可數計旁有方石一界劃井井若田畝色赭甚光瑩
可愛水盈盈終年不竭土人呼爲千秋田再進半里
有石柱對聳高與洞齊大可數圍或傳卽將軍繫馬
者也由柱再探有小石門極幽暗隱隱聞泉聲琤琮
若琴筑然樵人言內尙有潭產青魚有臺寬平可登
有石牀及几可卧可凭愆余秉火入覺寒甚欲震齒
遂出憇石磴詢所以名將軍之義樵人曰將軍特洞
名之一是本名三公又有稱張公者或又曰北麓謂
居北山之麓也余思以義論則北麓爲近若曰將軍

而又以公稱殆謂衛踞荆襄上游爲楚西雄鎮武功
文教於斯爲盛歟抑實有將軍張公其人者曾遨遊
其中因紀其盛而名之亦未可知要其勝則均不繫
乎是也歸後晤諸長官暨邦人之好事者爲臚其景
述之莫不神往明年秋守戎吳公遂偕二學博諸茂
才往遊焉皆歎詫以爲未有因各爲詩歌以張其盛
嗣是岳別駕崔公慈二尹李公聞而羨之亦郵寄聲
藻遙相應和而四方文墨士追步後塵來訪是洞者
絡繹不絕洞之鳴於時洵自今日始矣夫鬱而必宣
者理之恆也以洞之淪落荒服數千百年來僅得山

村樵牧歌吟躑躅其間而妄立名字輾轉訛傳卽當
日編輯志乘者亦未嘗搜採及此卒俟予與守戎諸
君爲之刮磨表暴始得彰徹於時雖曰山靈之陰啟
之歟詎非地與人相值有時其因緣爲不淺哉且如
零陵諸勝蹟柳州以他鄉謫宦而猶不欲使之鬱湮
則予今以永人而倡爲是遊殆庶乎尤大雅所許而
不至貽媿於洞天者歟爰哀輯衆作付諸手民且以
數言弁其端時萬歷壬辰春仲望日也

送莊在五年兄學博歸養序

安福知縣 姚思恭 永濟進士

古者家貧親老不爲祿仕則爲不孝是則然矣顧吾思之親老矣尙可祿仕乎哉夫秦漢以上仕皆不出於其鄉委吏乘田聖人不惜亦以井邑咫尺入可事親出可奉職無事負米而甘旨修焉此毛義之所以捧檄色喜也後世雖一命之吏多在數千里外越之北燕之南祿薄官卑資餘莫致而衰年遠道迎養尤難誠人情所同慨矣我

國家立制念教員無關禁防選授盡本省於儒者甚便而遠近亦復不同有二三百里者矣有七八百里者

續修永定縣志

卷之十一 藝文序

三

矣更有二三百里者矣其間山河間阻道路崎嶇雲山飄遙音信隔絕雖曰同鄉而有萬里之勢如是者仕則仕矣祿則祿矣余竊以爲無益於貧而重累於親朱子云非惟己之思親不置亦恐親之念我不忘誰非人子能堪此耶此余在五之所以急急告歸如不克終日者也在五負通才學可大有爲而少年祇捷副車此時家不全貧親亦未篤老而在五乃就廣文一似爲祿仕者蓋非爲仕實爲學也

高宗以來凡在舉貢皆得不次就挑揀爲親民之吏進而益上雙熊五馬豈伊無人而在五獨涉洞庭歷衡嶽

踰湘過桂沾沾求升斗於一氈久宦減產祿則猶是也而貧爲加甚矣然而學益茂才益長平日不屑屑於八股之文而爲文乃至不加點丁卯秋余以無意得之比出闈同事閱其文與人皆願出我門下也各上憲瞻望丰采將登薦板門下士益屨滿戶外切切欲傳其術而在五曰親老矣吾不可不歸吾不可不急歸然則在五之不爲祿仕者乃爲親老也昔人爲親老而仕今人爲親老而不仕仕不仕之間不皆可以想其心乎今在五歸矣無季子之金無嗇夫之衣無一石之裝行李無一琴一鶴之環左右方懼無以

慰親也而親視之面目猶是也特髮微蒼耳冠履猶是也特衣微結耳與之食易之衣賜之溷浴凡無所不顧諸子者皆無所不得於心者也而在五又率諸孫朝夕上食視寒暖入子舍取中裾襜必身自浣濯歲時登拜則菜子之衣也脩脯時陳則封人之肉也視在嘉時望白雲而指親舍其渺渺予懷者不暢然意得哉僕今年七八月後視茫茫而髮蒼蒼行亦將告歸矣計候門稚子當不減吾在五而獨有漠然無所向者以望松楸而隕涕固不若板輿之優游也然則在五之家不以仕不貧而在五之孝固不在昔之

仕而在今之不仕矣昔人云小人有母有母之可樂也其故在五知之於其歸也益親嘗之仕云乎哉

陵陽鳳山書院暨合邑紳耆公餞樊竹軒詩叙

前翰林庶吉士周師
知山西翼城縣

甲申仲春客有自故園來者其人樸茂而淳厚謹慤而溫文子曰夫夫也非得力於良師友之訓迪卽受範於賢大夫之薰陶誰與主吾州牧者其化民何若斯之速也問焉而知新任州主樊公臨蒞吾陸甫下車卽以宣讀

聖諭爲諄諄振興學校與書院諸生講授文藝不憚再三而其仁言藹如善氣迎人見者聞者莫不肅然敬油然而慕遂不自禁其革面洗心云時予聞之如見其人

續修永定縣志

卷之十一 藝文序

六

飲食祝之翹首跂足而望之正欲肅一函代仲桑梓孺慕之忱州人士忽走書囑子曰吾邑賢州牧竹軒公訓士愛民坐人於春風鑑物擬秋月勵精以圖方興未艾今將有一歲三遷之報欲攀轅卧轍而不可留願得先生一言彰之以繫去後之思夫以公之賢得諸傳聞爲最確方書之以當韋佩矧乃碑口如一不遠數千里而請耶因綜其梗概而爲之賦曰信彼南山松柏丸凡君子至止顏如渥丹父母孔邇之邦之翰又曰樂只君子

天子命之壽考作人何口忘之如圭如璧福祿宜之卒口

民亦勞止生我百穀黍稷稻粱介爾景福繫之維之
寤寐思服爰附郵筒以寄遠念且不啻祖道郊關外
與同里諸公親見夫車幾輛馬幾匹低徊留之而不
忍遽去云是爲叙

續刻崧梁書院碑序

趙亨鈐

辛巳蒲月中浣余蒞任斯土見夫天崇巖窠福德蜿蜒又有溫茹合流激濁揚清以爲此勝地也靈秀鍾毓意必有龍蟠鳳逸之士出於其間乃稽諸仕版甲科不少概見抑獨何哉大都人文之蔚起端賴學校之甄陶邑舊爲衛乾隆元年裁衛改縣至二十六年始建崧梁書院前尹郭公詳撥青魚潭廟田六石每年納租六十六石以是寥寥者量入爲出豈惟不足以給膏火卽延師課讀何待積二年之租始克濟一年之用興教之地誦聲閒歇都人士抱金玉之質末

續修永定縣志

卷之十一 藝文序

八

由追琢而發其光悵望孫山良有以也然則書院爲講學之地培植作育道在廣其儲蓄余始下車觀風課士訊問書院肄業膏火闕如此心歉然每至公餘老成謁見諏謀度詢必以此爲當務之急鼓舞作新蓋未嘗一日去諸懷也踰年書院齋長將刊續碑丐余一言爲之弁余用是稔知顛末初郭公詳撥廟田業已勒諸貞珉其田畝租穀石數不過爾爾厥後或墾或捐或置增數不過爾爾亦越嘉慶壬中該齋長貢士王師麟等接管經理幾次新置田產並捐撥田畝地租十年之內加倍從前俛助廓清可謂不遺餘

力矣夫有書院必需膏火省會嶽麓出自國帑若郡若州若縣星羅碁布小大殊制而膏火之多寡則各視其公項之所有惟茲崧梁初而始有繼而少有迄於今多方哀積雖未幾於富有足供膏火而聘名師開講席勤勤課讀不至曠年一舉繼此遊其門者笙簧六籍殽饌百家知水仁山各率其性之所近雲龍風虎共覘其學之所成誠盛事也跂余望之爰撰其略以補前碑所未載云

重建永定縣社倉叙

昔朱子創置社倉於崇安靖下其法路民以爲便後世行之而未能有利無弊者端在有治法而無治人永定社倉早經坍塌有穀三千七百餘石以經理不得其人就厰外寄虧蝕無存咸豐紀元邑人士領價買補僅得一千九百附貯常平外厰至丁巳歲發糶生息三年中遂增至二千六百有餘可見事以得人而治民獲其益而倉漸以充由是慎行之推廣之將不數年非惟彌補有贏抑且倍蓰莫算矣惟社倉久頽常厰不敷寄貯董事呈請以常平左側餘地借建

社倉數間爲蓋藏計余躬視度量再四熟籌其不便者有數事焉向例社倉置於鄉不置於邑司以民不司以官今議建處顯與例歧一也請附常平者籍丁胥斗級就近照管然例不許胥役過問原恐其籍端舞弊今若簷接棟連密邇朝夕難保無挪移溷淆別生轆轤二也常平額貯六千四百有餘終須全數完補內外十厰除一二盤糧貯米用已無餘後有因採買收谷碾米增厰另貯者舍此則別無餘地索還則難乎爲情三也常平有奉文出陳易新之時又或有平糶賑濟之日社穀支放適逢其會擾攘錯雜更多

可虞四也卽謂數者皆無足慮第今所議建者偏廂隙地僅可建四廩廩貯不及千石三年後又虞露積矣聊濟目前之急不足爲遠大之謀五也余復爲從長計議詢悉社倉舊基現存特經費浩繁未便輕議修建余聞之欣然以喜慨然以嘆此社倉也雖曰在民亦地方官所當致力而盡心者也余前任清祁時頗多興復若桑植則獨力完輯城垣鼎建奎閣密邇鄰封昭然耳目今社倉爲閭邑民食所關永遠攸賴旣經諸賢士實心任事大費經營奚可不助其擴充以垂爲久遠余自下車體察深悉士習民風皆能爲

樂善好義之舉今擬構倉二座約費千金首先捐廉百千爲士民倡更發給印簿屬諸董事善爲勸募聽其樂輸則大工可冀其速成儲峙允堪爲久遠一俟積谷稍裕經費略饒亟宜以次分鄉設廩列貯糴糶更便催貸易糶庶多歲無紅朽之虞足恃免青黃之慮此亦足徵今之賢董事者爲得人而良法美意固能力行而優爲之也賢董事者維何則戴生聯科周生其琳王生前培丁生啟俊樊生學知萬生鏢胡生其祥是也余以風塵鞅掌久不屬文而樂諸生之能爲治人邑士民之能爲善舉也爰徇其請而爲之叙

賓興碑序

周應元

蓋聞聖人御世八荒應貢舉之科王者掄才三物重
賓興之典以故岐陽而蒸髦土際運者鴻材郡國而
辟孝廉先遊者鶚薦珠不遺於滄海珍咸聘於大廷
固已翠鳳含綏丹魚在藻矣然而均爲匏奏麟鼓何
以郊天同是燈光龍膏獨能燭殿蓋樓臺近水得月
無費資求縱奎壁遙輝望風先羞囊澀華年王暕千
里難行雅意鬻生十緡不足無怪田何年老守道蒿
牀勉教盧子力爭終輸花樸此鄭莊作客必治五日
之行方朔齋糧須索一囊之米者也則賓興之助豈

續修永定縣志

卷之十一

藝文序

十二

容緩哉夫事以創始爲難力因繼成而易邑傳先輩
早慮南阮之貧資助後生曾分西鄰之富義田千畝
取農稞於屢豐仁粟百箱待

聖朝之大比元龍豪氣無用給騶司馬寒酸亦能勸駕無
如課耕不實藍田而玉易成煙立法未純紅朽而珠
難問米受鄉愚之侮辟穀年年鮮邑宰之監空花處
處何疑蕊榜聲名不列夫劉蕡由是荒隅翰翮徒傷
夫任昉余以儒庸荆北篆攝澧西才識妃豨規模甄
盎回憶三條燭盡倍憐多士薪勤宰相必用讀書人
豈維在昔秀才便以天下任敢忽於今用深旁午之

勞爲下重申之令邀同紳士振廢以增新量彼邑人
哀多以潤寡捐金旣憇憇尤須什襲得人構木作館
垣還卜珍藏善地派老成爲監理傍文廟爲倉廩近
聖人之居地感奮宜多廣蘇季之郭田徵收不少庶
秋風匹馬易攜三策之書壯采攀龍快檢五行之志
無那將成廣厦忽起跳梁防龍邑之驚禦鳳城之賊
生恐蟻力功敗垂成不意鳩工葺於後勁雖狐成集
腋舉得衆擎而駑本無才推偏領袖嗟乎楊雄有河
東之賦必待吹噓李巽空冀北之羣猶須推挽從此
河監貸粟壯白雪之曲高長府資錢助青雲而直上

又況天山聳翠夙毓名流茹水揚清豈無佳士葉孟
峻蟬聯甲第正好齊蹤吳載陽鹿宴丁年允推楚望
後來居上趙文子舉七十餘家於我有光崔祐甫興
八百多族上以酬

朝廷樸棫菁莪之化下以羅鄉黨榘楠梓杞之材是所
望也敢祈勉之

盧孝子傳

黃道讓

今天下慈父多而孝子少其喬野者以爲子若親適然相值前數十年親與子合教養婚娶引爲己任後數十年子與親分坐卧起居皆形其獨而又益之以弟兄受愛之偶偏婦人間言之易入遂至橫逆恣睢無所不至富貴家豐其供奉文學之士極意求合詩書無非畏物議博聲名而擬諸父母當日撫我畜我顧我復我時一段神理總覺不肖故外人或許以孝而父母不許也父母或許以孝而爲人子者清夜撫衷自問不許也何論天地鬼神哉壬戌冬予嘗與永

續修永定縣志

卷之十一

藝文傳

十四

定羅春帆同舟至永爲言庚申北上過任孝子故里遂作任孝子詩所謂任孝子者因父溺水奔救俱沒里人出其屍見孝子猶聳肩負父兩手握父臂不可脫嗚呼孝矣觀其能舍身以救父之死則其能竭力以事父之生可知然詢諸里人其說亦不一安得起古人而問之春帆曰吾鄉有真孝子其人見在吾嘗親見其孝行徵諸閭里無間然孝子姓盧名世華父諱應國早卒母氏徐撫孝子成立以薙髮爲業娶妻楊氏善紡績夫婦勤苦所得金悉以供甘旨或偶缺必典衣以備之夏扇枕冬溫席夫婦更迭爲之每日

出入雖數十度必告必面里人多其孝薙髮者爭就焉以故生事漸起每值母生日必借廣廈及屏障燈綵開筵宴客鼓且吹並大招優伶演劇獻觴本邑羅雲翹先生齒德俱尊者也亦來與宴母子榮之母春秋日益高一切需人孝子夫婦朝夕服勤若撫嬰兒然親奉檇榆者二十年矣其平日日夕無事則致市中諸善彈唱者彈唱已按節和之並時時間以科譚博母歡母以寡人婦得享富貴者之樂心寬體暢遂登上壽卒年九十有五矣孝子哀毀骨立塋祭盡禮生一女亦賢淑然無子則又天道之不可知者或曰

孝子誠孝其他行未能稱是故無後予曰古之賢而無後者衆矣如鄧伯道包孝肅諸人亦且無後且今天下之有後者更衆固不及孝子孝卽其他行豈遂勝之耶則孝子之無後亦與伯道諸人等耳未必由於他行若果由於他行則吾又得而論之曰嗚乎以孝子之孝因他行未能稱是遂至於無後則凡世之有絕德至行如孝子者安可不慎其餘而況萬萬不及孝子者耶

田孝女傳

黃道讓

孝女姓田湖南澧州永定人上舍榮寶之胞姊也生而端凝寡言笑喜讀書每觀古忠孝事輒慕之朝夕依依父母側以爲可以終焉也幼字周及長得瘖病百醫不愈父起明公以告周許另娶周從之閱三年疾頓愈起明公許欲另字女乃告母劉孺人曰男婚女嫁者常也然事處萬難亦不得已而行權爺孃老矣家日式微兒又終鮮兄弟兒若去萬一有風燭恐藐孤餓死填溝壑矣兒雖不才願事親教弟持內家以終起明公聞之曰能如是乎吾兩人將何求女自

是遂壹志服侍親操作備極艱辛闔內外事一筦於女女能雅善計然術不二十年稱巨富焉既而曰能聚而不能散者倚魁之行也能散而不知道者刀墨之民也每歲杪招諸寡人子問所需如數給之約以來歲有則償無則緩數十年來其一出而不復入者以千計尤尊禮文人族孫祚篋寒甚女解囊勸學遂舉茂才其好成人美多類此同治二年正月二十二日辰時無疾端坐而卒年七十有三猶然丫角也卒後面色如生身仍端坐不偏倚卒之前二月徧招諸負債者至出其券悉焚之曰毋令後人擾擾也衆爲

泣下其塋也白衣冠送者數百人哭聲震野翌日墓
上有白氣一道似煙非煙直達霄漢間亦一異也少
時於園中觀書書忽被風吹上杈桯間女誦金剛經
書忽吹至故生平頗信佛乃爲子弟輩所講者不出
四子書間能發聖賢精義旁通天文地理醫方相法
日者術亦喜吟詠但多偈語有一葉舟中藏世界之
句自奉極儉約而養親特豐遇疾侍湯藥衣不解帶
者彌月及喪祭塋盡禮故女之孝尤名播閭里云其
課弟讀甚殷爲擇名師教之髫年補邑諸生旋食餼
屢膺房薦肄業嶽麓爲山長歐陽坦齋所賞名大課

學者稱玉圃先生元配劉有足疾需人而行女扶持
之餘更爲置筵室李以事劉未幾玉圃卒後劉亦卒
三子昌期昌普昌恬皆劉出女撫之成立並多給李
田勸守節時李少艾然能遵女教靡他今已髮星星
白矣向所給田且加闢焉女卒後能如女之教教三
子以次子昌普名勒墓碑使奉女祀報功也從衆議
也雖曰李賢然亦何莫非女之孝思有以錫之類歟
黃氏曰孝女爲田氏女爲田氏子爲玉圃姊爲玉圃
兄爲玉圃師爲田氏諸子姪姑母田氏諸子姪伯叔
爲田氏撫孤臣中興佐市義客特未爲周家婦耳使

其爲周家婦亦不過無非無儀與古賢媛同未必能經營揮霍地道有終而又有成若是推是心也雖古木蘭緹營何以加焉或曰女誠奇然不可爲訓予曰不然自古忠臣孝子亦祇行其心之所安耳況權然後知輕重女不適周周家不至無婦女不終於田則田氏一門白髮兩代孤兒其所失有不可勝言者予謂女亦不幸而女子耳使其男子庶幾哉閔損曾參之性而兼端木賜及范蠡霍光之才者也嗚乎以一時絕無僅有之行而乃出於一女子吾儕鬚眉丈夫能勿汗顏哉

節孝湯母傳

陳達瀛

母姓余氏慈利光陞公之女光陞公教家有法母自幼習聞庭訓造次必於禮年二十適同州永定贈公湯君啟達甫一歲贈公卽世母哀籲搶地幾死者數四以曾祖姑祖母之勸不果殉方是時母年猶艾膝下又未有出以不入耳之言相煽聒者比比母悉不與辨姻長某復爲母陳某家康樂不去口母乃怒斥曰某家果康樂曷不爲汝女媳圖之姻長慚而退贈公族叔祖雙巖學博聞之懼母之氣矜也因謂母曰昔范文正公興義田於節孝婦極優禮然有欲他適

者不强留蓋苦節之難貞也母泣曰公長者胡亦不諒余心余矢死而已他何言學博公嗟嘆久之曰果若是足以愧婦之不節者我必請所以■旌汝我卽老後輩不汝負也旣翁若姑以贈公伯兄文學莘農公之仲子繼贈公爲子卽今孝廉華袞也母撫之慈愛若己出稍長延師課讀歲必豐其修脯曰他費可節嗇先生禮不可殺每督袞嚴逾於師鷄甫唱卽促令起親護送及館至晚坐之燈下取所讀書背而誦之詰屈者反覆使繹習焉紡織聲與佔畢聲相賡續以爲常嘗泣謂袞曰能令汝父瞑目者徒恃有汝如

汝不立無論汝母一腔熱血灑歸烏有卽他日何以見死者於地下今汝千鈞一髮嚴則傷汝祖父母心不嚴又無以速汝成若之何無所庸吾嚴也則吾之事已矣袞性本慧泣受教卒以讀書成贈公志湯氏故永定著姓同堂五代合爨百餘口母摒擋井臼米鹽及賓客庖厨之事井然有條賢能聲籍甚里閭每戚黨至翁姑必指母稱道之曰我老人子死有子者賴有此婦耳亡何姑逝母哀毀骨立虔事其翁審寒燠奉盤盂壹如事姑自贈公沒至是閱數十春秋母無歲不詣墓所親祭奠號慟之聲哀感行路猶然如

當口其姒氏劉孺人者袞之本生母也妯娒中於母尤歡好劉孺人性婉而母性嚴正見不禮者輒詞色俱厲劉孺人必從容爲之解劉孺人先母歿未了婚嫁母皆身任之所以報也母以咸豐二年夏四月卒年四十有六遺囑袞殷殷以善事祖父並修理外祖父母塋墓爲念咸豐五年督學劉公崐按臨澧陽都人士具母行狀上公籲題以方有軍事不果行六年督學張公金鎔閱其狀表以額同治乙丑得旌焉母本出巨族綺羅簪珥充溢奩篋自稱未亡人後手自封識終日戚戚不爲容色比至其媳入門檢授之則

皆缺損無完好者性約己而愛人布裳敝衫補綴不
忍釋至戚族子弟肄業其家塾者則自几案鼎鐺外
春韭秋壺餉遺不絕外家既中落念之尤篤己酉大
饑民缺食母每飯置箸涕下謂袞曰我與汝幸贍饗
殮所不能去諸懷者汝舅氏合宅老幼耳每數日一
遣人問恤之有餘則以分給鄰里之老且貧者聞之
其族有老嫗瀕卒見鬼物數輩亟命其子焚楮錢有
頃母至止勿焚曰鬼見節婦皆去矣事雖不經然亦
可想見母之烈云

論曰自近歲遭逢

續修永定縣志

卷之十一

藝文傳

二一

曠典海內之以節稱者一邑多至數百人嗚乎何其盛也
雖然節而曰孝則尤必視其子之成有以迪前光而
繼先志乃爲無歉此稱焉以予聞湯節母甚烈而其
孤補臣已能敦學行取科第則烈豈足以盡母哉殆
庶幾乎古陶與歐之間歟補臣而知節母爲陶與歐
其益思彰施之以永之於靡有旣也

童孝傳

岳常澧
觀察

何玉棻

蕪恬

呂敷孚字信臣湖南永定縣人也生有至性家故貧當七齡時父以所學遊於外母張氏病不能具藥餌呻吟床第間幾殆已而思肉食不得命敷孚貰諸屠屠不可敷孚泣而返無以奉母收淚入厨室取刀出右股割肉四寸許令五歲妹就松火中炙之以進母母食而甘覺齒頰俱香疾遂愈踰旬父歸詢知病狀竊喜其速愈也顧疑敷孚足微跛詰之以瘡對命出瘡示之則退而卻走迫而解其縛傷痕斑然痂猶未落也敷孚不能隱具以實告父大哭母聞亦大哭妹

續修永定縣志

卷之十一

藝文傳

二十二

不知何爲俱淚泫泫下事聞鄰里里人嘖嘖稱道之監生羅祥雲曰是奇行亦吾里之光也不可壅於上聞徑呈諸縣是歲咸豐壬子適今巡撫李公任縣事命至署驗之大喜賞以紅袍賚之金帛有差戒曰孺子天性良厚終將爲讀書中人勉之天必有以相汝吾將以是陳大府上之 朝廷會粵逆擾長沙不果行敷孚於是矢志讀書然貧甚日出負薪拾橡栗晚乃受學於其父稍長賴桑植陳明經重其嚮學課以經藝而督責之頗受益焉同治甲子學使呂公試澧州取入縣學何訓導一夔具以前事白學使贈以聯

有願此後臨深履薄勉作完人之語誠重之也亦賚金帛如李公敷孚得補博士弟子員重承大人先生之嘉許益淬厲於學學日益進何訓導復以事實會申巡撫李公亟允具題敷孚於是將以孝聞天下矣今歲試來澧州人士聞之無不願見而定交者蓋天性之感孚入人爲最易也慈利趙教諭珩記其事問傳於余乃次其顛末而爲之論曰割股 國朝所例禁誠以戕賊父母遺體傷天地之生氣也余觀敷孚割股年甫七歲特出於一念之至誠豈復冀後有旌之者乎 朝廷褒賞有加敷孚當之不爲榮亦不愧

卽不然而宗族傳爲己事閭里播爲美談咨嗟嘆賞及於鄉先生而事久論定卒出於名卿士大夫之口其至性又可磨滅乎哉世有奉養無愆而誠不足者可以風已

貞女羅二姑傳

魏 湘

貞女姓羅氏今崧梁書院山長春帆孝廉名福海之
子女子也少小時未命名字人以其行二羣呼爲二
姑云客臘永邑友人田子修吾莊子蘭臯孫子輔臣
覃子少甫戴子志軒等謬以予爲識塗老馬持書幣
走數百里至予家聘課制舉藝適予總修縣志告竣
歸誓不復出因諸友人皆舊相識且素以能文名先
其請春二月來館甫數日春帆招予飲其家把酒談
心未曾語及二姑病四月中旬競傳二姑凶耗至予
驚悸者久之詢其何以致此僉曰因亡壻故噫二姑

續修永定縣志

卷之十一

藝文傳

二四

得死所矣春帆痛女甚日夕涕不止蒲節後親詣予
館袖所作二姑行狀示予乞爲傳贊纂入邑乘中余
不忍拂其意乃取所爲狀讀之狀曰女生而貞靜貌
端秀至性過人五六齡時先君子雲樓公方健在日
以詩酒自娛每引杯必挈女侍案側祖孫妮妮語不
可辨間授以唐人小詩並爲談稗乘中可喜可愕事
女自是喜聞書傳先君子歿後復索海稱說海以其
慧能領解迺更舉古今婦女之貞孝節烈者推廣其
義以牖覺之十餘年來聞之旣稔凡一言一動悉衷
禮法親族知與不知俱齊其口以婉淑稱初不意今

遽殉壻而死也壻陳姓名昌炯其父保臣明經少與海同日籍於庠稱莫逆故女甫二歲卽許字炯炯穎悟有夙根未成童所造卽斐然可觀武陵劉采九大令保臣故交也以庶常來遊永試炯帖括文及詩賦雜作賞其敏瞻目爲雋才保臣舉告海海曾引李雨村詩恠君頗有譽兒癖似我方稱擇壻工二語復之近兩家以兒女年俱長已訂昏期於今年三月正月杪炯忽攫疾時痊時否三月十日竟不起海往唁歸囑家人秘之毋使女知廿六日海在院課徒僕婦走報海曰陳郎訃有洩之者二姑抱主母呼天號慟勢

欲尋死我等勸不聽主人請急歸海不忍目覩慘狀倩其母舅丁子禾田昆季先往開譬號慟如故海歸家責以不孝始收淚入寢室遂不食不言形如木偶強之飯惟進粥數數而已素本羸弱善病不幾日益瘦削僅存喘息十九日未刻端坐逝距壻喪僅半月餘耳當悲痛時自言命薄如此天罰我酷如此我何以生爲從旁有解勸者曰姑尙未婚可別字人則怒斥曰爾以我爲若是賤耶哭益厲計廿日中或起對鏡嘆或小語云此亦奇事奇事或連聲呼母及至前則又嘿無一語吁悲已海自先君子棄養潦倒頻年

遇錢刀支絀日女必多方慰解令海開顏且代爲籌
思補所不逮以弟永璋生最晚助母撫蓄尤勤劬嘗
累日夜不眠每當冬夜圍爐團圞偃坐室中一燈熒
熒輒舉祖所授小詩轉授之弟按節嬌吟一字無訛
至今永璋出拜客能誦唐人斷句者皆其教也有妹
三人巾櫛衣履特揀佳者相讓稍不愛惜卽婉言諭
曰汝輩但以吾父歲入束修可追飢凍殊不知歷年
以來嘔盡吾父多少心血其善體親心率類是記女
初生時天方曙海母舅王公漢臣與先君子同榻寢
聞海入告瞿然興曰異哉我方夢一女子珠冠錦帔

率婢媵來汝家得毋卽此嬰耶先君子喜以爲祥由
今觀之其祥果安在耶女生於咸豐初元年十九其
母丁爲邑庠生啟性啟品姊狀中所稱述詳予亦夙
聞二姑賢知春帆之狀不誣也故哀其意而哀次爲
傳焉

贊曰烈女不事二夫與忠臣不事二君其義一也世
有鬢眉丈夫食人之祿一旦遭逢陽九而變易其心
所在多有况一弱女子尙未成婚者乎而羅二姑乃
聞訃絕粒之死靡他視衛共姜之守義不嫁咏柏舟
以誓吾未知其何如而要其至情所至無所擇而爲

之固非一切偷生苟活於人世者所能北也嗚呼可
以傳矣

續修永定縣志

卷之十一

藝文傳

又二十六

羅宏仁傳

胡瑾懷

庚午秋邑乘將竣同人皆赴闈予與羅君春帆戴君志軒補輯校刊以葺厥事客有談羅宏仁撫孤軼事者瀝胆披肝忠義憤發歷數十年志不少衰談者詞愈切聲愈厲鬚眉畢肖凜凜猶有生氣四座悚然爲歎服者久之羅宏仁者呂震父僱工也震母早歿震昆季四俱幼無何震父尋病革族多無賴將不利於其家乃以後事囑羅曰旣無伯叔終鮮兄弟其若諸孤何羅慨然身許之言未及終而卒是時呂家故不豐震八齡共季甫逾週旦夕操作皆仰給於羅羅左

續修永定縣志

卷之十一

藝文傳

二七

右攜持日以大帶繫季懷中屏當一切拮据萬狀若母雞之育羣雛者里黨見之謂是呂家婦也何愚忠一至於此逮震昆仲稍長以羅分卑漸爲不率狀羅柬致震族於庭泫然泣曰予一傭工人受故主遺命滿腔熱血雖粉身碎骨不敢忘然予鬻諸君且父易夕母難十餘年焦勞亦大可憫矣今君等將成立不復需予予去矣夫何言震等感悟且泣且留嗚咽不能出聲座中皆掩泣自是震等唯唯聽命而羅志益堅教讀婚配以次而遇有覬覦其家貲者百計傾軋禍將不測羅毅然不屈以隻身叩縣叩州歷數載訟

始息方其受囑也貲不滿千緡北分箸則以萬計羅秋毫無取震等屢請爲羅娶謝曰吾老人何須婦倘生子是反貽後日累也年七十以鰥終邑先輩呂正官題其墓有生平已遂託孤志之句人咸榮之正官故嘉道間端士性慤直不阿勢利有故交豪族某其僕偶慢官官遂與絕及歿人有夢神授以詩者記得城南僕貶語此心惟有紫瀾知始悟官已爲神以其與劉紫瀾相友善也

贊曰古來託孤寄命所不忍負者心耳人生爭此一心可一日即可千古羅宏仁一人役耳乃爲呂氏嚴

父爲呂氏慈母爲呂氏忠臣義士以傭保之身而心伊周之心設與之扶社稷植綱常其卓卓有所表見者夫何至大才小用哉然而可以風已

元故將仕郎澧州路教授王君墓誌碣銘

翰林修撰奉訓大夫同知制誥兼國史院編修官

謝端撰文

奎章閣供奉學士亞中大夫宋 本書冊

奎章閣傳書學士翰林直學士中奉大夫知制誥

同修國史虞 集題蓋

王氏出於太原君七世祖洛宋建炎初朝奉郎知卬州生
朝議郎知安仁縣世才安仁生文舉以八行貢於朝八行
生朝奉郎成都尹讜生將仕郎淵君曾祖也始居成都之
廣都縣將仕子庚字季長生廸功郎江陵司戶丙發司戶

續修永定縣志

卷之十一

墓誌

二九

府君登宋戊辰進士第歲乙亥丞相楚國武定兵至江陵
守臣高達以城降宋官皆仍其職府君獨以疾辭和歸去
來辭以寓志平章廉文正公嘉其節欲以府君令松滋或
教授長沙府君又辭衆強之以府君重違宰相意乃授慈
利州教諭遂終隱焉時至元之十一年君生十三年矣君
之始生也宜人濯氏夢熊入室故小字熊浚名曰元明字
誠夫府君始以兵火出蜀橐中惟禮部韻一帙君齒雖少
能奮然自力治生業以養親暇則聚書而讀之能儉以勤
仰取俯拾卒至完美而不私所有遣甥往歸成都具展省
禮且致從兄王德甫音問以來濯宜人弟寓湓浦君往

迎之凡濯氏淵族皆挈家至君居之左右賑其乏絕舅歿
塋如禮妻弟宇文元孫七歲而孤君教育成立猶己子大
德十一年水暴至瀕水居者將湮沒君懸賞募善游者拏
舟往救凡活一人畀寶鈔十千民賴之不墊溺水死者男
女八十餘人州民葺茅以居不戒於火燬者輒數百家君
計口周之明年乙丑火丁卯又火皆藉君以給米粟千餘
石民得粟者白之有司及風級乞旌其門君力辭里有廢
疾者月與之粟病者給以藥死者爲市棺轆州之北曰東
陽村有溪曰芭茅可以溉田民不知其利歲里輒飢君權
其高下梁石釃三渠溉田數百頃君無町畦之入民唐與

續修永定縣志

卷之十一

墓誌

三十

妻張以歲歉售六歲女於君家踰十年一日陳其幼嘗許
婚朱氏矣君呼媒及朱氏子畀以去不責其償也嘗攝慈
校官學不足於廩君爲置田歲可收穀百餘斛又販銅爲
簠簋尊壘彝凡百五十又具諸生之執事者儒服四十襲
皆君出之私帑也廉訪公司嘗以貌異薦君君一出爲岳
陽錄再調澧之學政三爲澧之教授君之仕止於是而德
與學則豐矣君於是讀書如飢食渴飲然生平購書至二
十萬卷作樓曰德符處其上君披閱點勘日有定課至夜
深乃寐非對賓客治家事書未嘗去手晚年於義禮之學
充然有得而尤邃於易與書科舉興君由鄉貢至鄂雖屈

於人而志不少羈乃哀其文二十卷號達意集翰林侍讀
學士巴西鄧公爲之序以爲言近而指遠非膚剽以爲文
者娶宇文氏以子官七品封宜人淑慎溫惠能相共夫初
受宜人之命告其子曰若不先白我所逮事先姑當讓封
焉旣歿而葬君嘗自誌墓基且卜窆於州南懷德鄉臨陽
之原虛其右君將以自藏也明年天曆二年七月初四日
君亦卒春秋六十有八將葬其孤狀君之行以授君之壻
劉南美來京乞銘太史氏屬謝端端不及識君君當手抄
其文十餘篇以書命端曰子爲我叙之端謝不敏藏之家
又十年矣顧雖不敢叙君之文君豈有意不鄙將託之端

續修永定縣志

卷之十一

藝文墓誌

三十一

以爲不朽之傳哉故今銘君之墓再不敢以固陋爲辭嗚
呼君之集行於世世固自有知者顧君之行仁於九族睦
於鄉里與其殖學之勤人所堪知者敢表而出之君之子
孫將有食其報而興起者乎子二人女三人孫男五人女
孫七人銘曰

士修於家以待賓興德行與藝各奏爾能其行之成可以
觀德藝以授之合三而一考君之素六行不遺於家於里
以大厥施爾有孤嫠衣我食我蘇爾痼瘵免爾水火多士
濟濟集於校庠祭有簠簋又峙其粳孝友睦婣任恤之行
嗟我王君今孰與並矧富於學其文燁然如農之勤而不

逢年德符之樓經傳圖史手澤丹銘以遺孫子子仕於朝
陞陞以陞封勲階爵君茲其膺古卿大夫沒祭於社阡表
有銘同焉式化

續修永定縣志

卷之十一

藝文誌

三十二

大庸衛推官袁公德政碑

杜春榮

吾聞誦德政者稱口碑今天下之口亦大難調矣况世祿家生長紈袴權便虜使其下而恬不恤身家事則自營不已軍國長久事坐聽委墜不復振如是者眾因目擊而心傷之有口奚碑哉余不佞舌誅此輩也久矣一日大庸鄉老申以敬王宗禮等齊赴予曰爲袁公乞碑記種種具述以不盡噫靈哉未有碑先有口矣大庸隸永定迤西扼永保土司之咽喉邇來樓前公署一切口圯居者苦綠林役者呼庚癸而寥寥部伍日疲於東蕩西征不得息是時公以考選初課是用一載起敝習而大剏之修廢政則首藏

續修永定縣志

卷之十一

藝文碑

三十三

城樓詳公帑捐私貲任勞怨一拮一拮不言瘁清萑苻則日積深牘將欲聽成不忍留國儲計入計出俱有度不復令操屯諸軍蒙菜色且彈丸邊隅界諸司咫尺正苦缺陷不及補而多載軍弛欲請團練以澧陽此時永定人皆不免公獨力與當道爭而斷不遵其檄此一快事爲國爲民謀深慮遠至以凡童若叟歡舞揄揚不輟者至如催科寓撫字同寅篤協恭飲士大夫以稔而藹眾庶以春則人之循循剩技不啻口出者多矣夫若輩纍纍若若無非縻國祿潤私家所餘軍國實政如惺我袁公嘖嘖人口者烏有哉余與公至戚不能文但謂者曰有里閭父老在口卽是

碑矣何必石而不知政以愧事而漫不事事者隱令取石而臚列之以碑載夫口公諱三長字惺我吾楚三袁之系也至與小修祖諧先生而天言屬公鎖鑰則勒績燕然文章事業當兩弗如矣公壯齡也勉哉幸無愧此石以謝諸父老

碑剝者蝕過半字蹟多刊缺不可識故篇中文義間有模糊今姑仍之

續修永定縣志

卷之十一

藝文碑

三四

諭螻蟻文

徐奏鈞

永尉署後圃有大槐數百年物也中有蟻穴冬蟄夏出色微赤有翼而不能飛蚋蠅蛾蚌不知其爲何種也聞之前任胡君多時塞窠盈几余甚慮焉乃爲文以諭之

惟嘉樹之敷榮蔭尉署而祥呈近訟庭而聳翠用誨導乎黎氓深根旣貫於地絕而神木實應夫虛宿之精及春初茂踐夏乃繁靈鵲巢而晨噪翔鸞集而日暄布元陰於城堞散微响於庭軒老幹長而雲挂大葉密而風翻詎不若哦松之流韻而栽花之滿原也

續修永定縣志

卷之十一

藝文

三五

哉乃有黑衣之族元駒之隊聚若兵屯散若騎退累土成坵穿根作塞穴雖雨而不封垤向陽而常晦自以爲國於槐安而傳世迄於萬代矣夫鰲冠蓬山不若爾之戴粒而逍遙也鯨遊滄海或遭爾之漏堤而嗜銷也雖行軍藉識水源之白而縱獵難免掘穴之燒爾何不安處蘭錡之石而弗使神燭之彫乎矧斯署也踞羊嶺之巔受犴獄之寄前仰鬢宮左隣縣治職捕盜而安良理除害而興利雖楚國之微員亦天子之羣吏旣捧檄而蒞茲宐相安於無事頗聞徃歲若輩階厲引類呼朋周遭連綴晝寢升床晨興盈砌異

蚯蚓之能廉比螻蛄而善噉緣及木瓜嚙連丹桂寄
跡斯槐實爲巧計將驅鱷而先爲文豈投鼠能無忌
噐今茲暮春已屆長夏將臨薰風扇暖於蘭室晴暉
曜景於竹林花蕊繁而蜂闌柳梢長而蟬吟正羣動
之啟蟄爾其仍聚族於槐陰毋踰我垣毋入我室行
勿動埃出還以律尙娛意於衙齋藉蕭閒於永日又
奚煩河內之火攻而深虞魏武之羅密乃盟於槐勿
剪勿摧本根是庇耦居無猜尉也房止動植滋培凡
百君子視此盟哉

天門山賦

熊國夏

溯夫乾坤一闢日月雙丸澧流如帶庸衛若磐惟崧
梁之峻極實南楚之鉅觀脈發雲中擠玉門而鳳舞
支分岷嶺齊天日以龍蟠接崇山之屹囓環茹水之
清湍北周望秩以隆儀祀傳建德東吳洞壁而設郡
祥紀永安似豎猿門素壁之千尋嵒崒如排鷲嶺青
峯之十六巒岈則有玉堂璀璨金匱琅玕箭筈挺生
於霄漢簌箕揚起於雲端高遠之鐘聲縹緲玉壺之
冰鑑凌寒風月含漆園之景煙霞老丹竈之餐天姥
策扶以流憇負兒羅列以承歡猿點成羣古木繞孤

續修永定縣志

卷之十一

藝文賦

三七

雲兩角雞籠報曉桃都望初日三竿老僧聽濤筆架
助題詩之興將軍聚米努牙張飛檄之壇列岫眞堪
厯指雙扉兩不厭看若乃山溪分派萬壑爭流天堰
瀉銀河訝千絲之瀑布仙溪拖匹練驚七寶之珠毬
橋似駕夫長虹影橫斷岸石堪敲兮玉磬音徹鳴球
石乳滴殘響丁東而韻協竅注激宕聽子細與神謀
爾其秀氣獨鍾羣材並育布葉崇阿垂條林囿巖桂
秋香山梅春馥玉蓋仙芝金英逸菊龍鱗挺偃蓋之
松天帶列倒垂之竹薜蘿掛於巖巖蘭蕙生於幽谷
棗黎橘柚雲披而葇鬱離離栝柏梗柎風靡而灌叢

簇簇以及龍鬚充藥圃之材虎薊列園林之木無非
嘉卉之葳蕤而山靈所孕毓者也更有錦鳳白鷗文
狼元鹿蒼鷹振翮以遙翀狡兔競馳而跼伏仙禽之
翅大如輪小鳥之身輕若穀狙工聯臂懸絕壁以吸
泉攫喜同羣拏纖枝而轉轆駘毛羣翩翩羽族逼
仄嬉遊駢田飲啄他如伏翼飛鼯繆虬長蝮光怪陸
離紛騰徵逐又不獨鳥銜花落於碧巖猿抱子歸於
青麓爲先哲所品題補山經於簡牘况乎勝狀無窮
隨時俱麗暉含旭日鶯花迎笑以呈妍涼透薰風鳳
竹搖聲而蔭翳挹秋高之爽氣嵐光與二酉俱清領

冬朔之凝寒雪色偕七星連綴至於崇朝遍兩雷洞
嗔掩耳之威大塊迴風雲窟擁盪胸之勢闢門叫闔
靈氣於以往來披闔捫天雲物爲之啟閉南衡之天
柱比肩西代之雁門遙睇青雲之梯石共登赤鯉之
魚池足憇覽山皆小憑高騁林壑之懷有仙則名恣
勝結苔岑之契是以幽探謝屐景入奚囊形號方壺
仙境篆留鬼谷元方赤松子丹九成而有竈周文史
封三斬而若堂誰繪山圖張兌詞成珠玉羣看曙色
朱蘊句琢琳瑯構院田公講學之風流不遠撰碑余
闕摛文之遺韻難忘躡足雲衢等蘇門之長嘯舉頭

天外通帝座於微茫豈徒侈泰岱齊名阿閣之東西
闕闐夫乃嘆天台作賦興公之金石鏗鏘

五古

過歷山湛長史草堂

南宋南平王

劉 鑠

茲嶽蘊虛詭憑覽趣亦瞻九峯相接連五渚逆縈浸
層阿疲且引絕巖暢方禁溜眾夏更寒林交晝常蔭
伊余欠淄湟復得味恬淡願逐安其生於焉愜高枕

疇南平王

晉人仕南

湛方生

閉戶守元漠無復車馬跡衰癯歸邱樊歲寒見松栢
身慚淮陽老名忝梁園客習隱非市朝追賞在山澤
離離插天樹磊磊間雲石將此怡一生傷感駒度隙

經漢高廟

南宋

范 泰

續修永定縣志

卷之十一 五古

一

嘯吒英豪萃指揮五嶽分乘彼道消勢遂廓宇宙氛
重瞳豈不偉奮臂騰羣雄壯力拔高山猛氣烈迅風
恃勇終必撓道勝業自隆

武溪深行

梁 劉孝標

武溪深不測水安丹復輕暫侶曹鄴集作借莊生釣還滯

岳志作阻鄂君行櫂曹集作謹歌岳志作呼爭後曹集作復發譟鼓逐

岳志作助前征秦上岳志作地山川險黔中木石并一作水石清曹集

復清水林壑岳志作巒秋瀨急猿哀岳志作奐夜月明岳志作霜鳴澄

源本千仞迴峯忽岳志以下俱缺峯萬榮昭潭讓無底太

華推削成日落野通氣目極悵餘情下流曾不濁曹集

得作長邁寂無聲羞學滄浪水濯足復濯曹集纓一作詩

武陵張九齡詩誤

題駐馬溪

州牧何璘

溪在澧屬永定縣之茅岡司乾隆丙寅秋余甫到澧適在溪民有水患馳往相度覩溪山情狀感而賦之此卽命勒石

平生好探奇到此忽改視溪水更有神溪山更難擬
涓滴藏蛟螭半夜風雷起扶石走波濤大木根株徙
谷口塞槎枿浮梗嗟何已劃然雲霧開雨歇溪無水
峨峨溪上山土崩石岷壘夾溪一丈餘參差相對崎
拔地撐青空林立爭怪詭方員名肖形想像隨所指

續修永定縣志

卷之十一 五古

二

因思蠻中山霾沒寧惟是巧匠不能爲溪漲陳厥美
寄語蜿蜒虬長劍吾所倚何不惜吾民乃爲山靈使

北溪

何璘

潺湲北溪長雙崖陡如切老木覆陰森蒼藤紛糾結
寒氣栗肌膚曦光乍明滅仰窺一線天厚地何時裂
攀緣石隙中半空鳥道絕下臨不測淵疊足猶防跌
伐木架虛空梯橋通跛蹙前者呼徐行後來互提挈
點象百丈高尠轟落天穴猿狖相叫號飲掛如繩綴
雜卉羅丹黃怪禽矜喉舌杞梓與梗枓蟠根老霜雪
良材世所資支撐委截業託根偶不諧貴賤從茲決

物理亦何常人事分巧拙振衣出幽深恍然天地別
仙徑雲梯

俞棠

東海三神山可望不可到此徑儼階梯蠟屐欣然造
况有九天雲扶我成高蹈

丹竈浮煙

白雲如帽絮鬣隸迷林麓疑是爐煙起丹砂煉初熟
漸看宿山頭溶溶還待族

石門凝碧

浮嵐翠幾重蔚藍天一色非霧復非煙凝鎖天門碧
我欲杳靄間扶筇一登陟

續修永定縣志

卷之十一 五古

三

斷山虹石

行行歷山腰巨壑幽且曠路斷忽復連彩虹駕其上
從此欸天關不用仙人杖

觀水碓水車有感

劉宏宣

大道貴自然聖人寶其智陰陽運兩輪乾坤轉磨類
神施與鬼設其理自平易惡彼小智輩穿鑿損天意
璇璣紗規天轉蓬觀行地一物落終古萬代食其利
堯禪暨湯征機軸本無二因勢爲利導莫之致而至
豈但文命禹行其所無事

赤松山

羅復元

昔聞張子房從此赤松遊藥竈蒼蘚合丹井寒蒲抽
巍巍帝者師何事謀歸休咸陽嘆黃犬爭如五湖舟
知足故不辱知止故不憂擾擾道旁者駕言焉所求
宿道堂寺
郭六宰

朝遊百丈峽暮宿山中寺靈壁既奇觀松梵復幽異
蒼然萬古心鴻濛豁深邃中有龐眉□三五扶杖至
問女何方來生計言無累百年仰
皇仁此中蕃老稚有足未登城幸與使君值雞酒相提攜
願博今宵醉談笑略躊躇桑麻勉再四顧爾持之去
兄得須思義渺茲山水鄉高情夙所寄公事有程期

續修永定縣志

卷之十一 五古

四

雲木空青翠豈不愛宏達自懈乃爲吏
丙戌花朝考取崧梁書院膏火詩以紀事

趙享鈴

種樹培其根期在枝葉榮引水濬其源期在波流清
朝廷慎作育所重尤經生才曰秀曰茂責實嘉其名
通都大邑會濟濟羅羣英如紫陽嶽麓名宿持文衡
餼廩稱其業薪水有餘贏百工既居肆相耀藝乃精
嗟嗟吾永邑此舉殊難行捐廉既無幾集腋徒紛營
豈無英特姿傷哉飢寒并貧窘困志氣奔走紛聰明
無以裕其養曷以觀厥成每蒞講堂上宰官顏爲□

何期慕義士竟普願力宏慨然割膏腴歷歷陽和坪
君子成人美首事尤崢嶸勞怨兼仔任釐然議章程
宰官顧之喜慰我饑渴情標期集賢俊一一視題評
優劣覘諸學棄取矢公誠給以日用資聽其絃誦聲
崧梁好齋居庶免呼癸庚勉旃佳子弟努力三年鳴
龍舟競渡

田榮超

艚縮利如梭洩迭駛似箭挽上夜珠灘瞥見街半面
兩岸擁萬人中流通一線龍舟一十三金鼓吼雷電
銜尾輕似鳧競渡飛如燕浪花落篷窗橈旗破江練
錦慄互奪爭水戲性命賤尾大揚不掉頭高角掎拚

續修永定縣志

卷之十一 五古

五

中權激飛湍幔空撒雨霰有如戰昆明旌旗亂貫穿
又如戰昆陽雷雨震江甸左右角觸蠻天地躑慘變
吁嗟凌波軍千載心目眩是時五月天花明景繪絢
錦纜掠管絃牙檣搖歌扇霎爾日虞淵紛紛游客倦
歸路踏殘陽萬山嵐翠徧

立秋日遊靈巖寺

田經畚

峭壁夾溪流清瑤縈山脚恍入巴峽中山鳴鼙響惡
水複抱迴峯山偏壓磗壑曲徑邈人煙靈巖轟庵閣
危樓樹槎枒經堂石錯落窗花疎背巖庭葉森張幕
磬罷魚山梵泠然好風作凭陵雲氣深微覺葛羅薄

初地逢寶誌雲山翰墨託佳詩妙如仙四壁碧紗絡
我亦肆騷懷祇園任怖鴿揮塵發清獻山山皆應諾
其二

清境難久畱抗策踐歸跡夕霏林杪收返照闕壑白
悠然嘒嘒啁苯蓴蓬茸隔餘霞護新月慘澹哉生魄
龜坼稻孫青蠨蝦魚兒碧岸屈起迴颿寒肌粟生腋
虛牝叩幽律螺轉山蹊窄迴矚靈巖寺雲氣噓青壁
我本山澤癯風嗣蘓謝客新詩當玉帶留鎮金山宅
巖姑祠
戴聯科

續修永定縣志
卷之十一
五古
六
遺廟經重新憑弔恨難已江清不見人月照寒潭水
冒雪入仙溪紀行
戴堯典

白晝忽黃昏漫空迷飛鶴我坐籃輿來蠚行聲郭索
劈面風如刀罩頭雲似幕蜀道亂崎嶇鬼谷窮捭闔
經過幾重灣風緊雪更虐前途滅人踪恍疑走沙漠
輿夫生退心予意早忖度急爲下車行那顧敝裘薄
抖擻奮精神領隊先踴躍老松當路立拘寒勢不弱
隨香尋梅花細當點心嚼高唱郢中歌逸響震巖壑
反笑孟浩然騎驢無此樂若使身在輿徒受滕六縛
履險自得平前進莫步卻望見炊煙起知有好村落

其二

傍晚入蓬戶客來笑不速主人起相迎舉家親弗熟
爐添束縵火盃進却寒粥草榻設空庭呵凍氣蜩縮
身卧萬壑間竒景想在目溪聲爭進門山勢莽吞屋
怒濤風拔樹淒音雪壓竹伸腰虎熟眠聯臂鬼聚哭
寂寞向誰言恐懼惟慎獨追憶弱小時隨兄來此宿
彈指二十年傷心淚盈掬輾轉不成寐復起翻書讀
開卷自得益何必定案伏兀坐擁薄衾寒燈一豆綠

七古

武溪深行

漢馬援

滔滔武溪一何深
鳥飛不渡獸不敢
臨嗟哉武溪多
毒淫

天門山圖

明張兌

我家三世居山國
寢食嬉遊見山色
去年前向京華
行萬里平原載車
轍荆山嵯峩鎮南
紀華嶽金精照
秋水太行延緜墜
馬首北望居庸雪
中峙歸來泛舟
灘與江匡廬相接
高崆峒南過瀟湘
望衡嶽九嶷蒼
梧羅煙幢此生倦
遊歷艱蹇故山屺
律聊游衍今年

續修永定縣志

卷之十一 七古

八

直上天門峰始覺
從前興猶淺天門
洞開雲氣通江
東峩眉皆下風低
昂二八若昆季意
氣相傾爭長雄
清猿夜號霜竹折
猛虎晝嘯山石裂
風來往往神聽
聞日上時時天帚
揭煙蘿紛敷薜枝
垂細禽飛來如
棗肥六月仙源溪
水漲中有洞□□
□螭可憐宜都
周內史古塚纍纍
在山址感時撫景
亦愴然周樸短
篇焉足擬茲山冠
絕平生遊安得雲
梯登上頭左攜
赤松右浮邱下眎
八極塵埃浮楊侯
此圖誰爲寫天
下名山無似者他
日功成期早歸相
與爲鄰住山下
望天門山

俞調元

壺頭之山高穹窿煙嵐凝結凌青空山腰誰鑿石壁
破雙扉洞達中玲瓏傍有崇山及圓頂峰巒圍抱經
千重傳聞方壺相彷彿至今來往多方瞳扳援我欲
一登陟筋疲力盡終難窮縈紆盤磴知幾許崎嶇祇
可猿鳥通平生本有山水癖朝夕相對興愈濃方壺
園嶠不可到此山真足豁心胸終當歷險入天闕徘
徊就覓神仙踪

山行有感

許紹宗

我家古長安去山五十里終南究何有未曾一仰止
十九匹馬向西走有邠山上曾置酒弱冠一躍登龍

續修永定縣志

卷之十一 七古

九

門禹王廟前亦頰首偉哉太華鎮西秦殷柏周松跡
尙新此是生平開眼界摩挲三到揖僊人出關道經
中條山千里平淺無奇觀泰岱在望目一卽始信人
問觀海難扁舟乘興到揚州幾度平山倚畫樓又去
金焦看山色江天一望寄蜉蝣未幾獻策到神京形
勝諸山列畫屏秦豫幽燕數往返名山處處總關情
前年身到蓬山裏蓬山可接不可視轉瞬紅塵小謫
仙又教看山來到此瀟湘自古名山地屈子遺芳致
生淚我來直上萬山巔終日滿眼飽空翠官舍前對
天門山奇峭頗亦具峰巒後有福德數十丈抱郭青

山相迴環此外土山不知數山經爾雅莫能注有時
轉入白雲深亂草槎枒無去路君不見三百名山知
名早古來吟詠都未了况此新經開闢餘無怪前賢
足跡少舟行陸行山未遍細憶從前無及見始信造
物具神奇峰峰各自開生面我欲乘槎附張騫撥開
雲霧問神仙未知弱水三千外更闢青山幾洞天

上灘行

長沙人朱衡

萬壑風生雨如注畫卧蓬窗忽驚寤起看白日青天
高但聞舟子羣呼號前灘奔騰後灘急欲上不上心
煩勞數人偃僂負絳走一人揆柁苦掣肘一人裸立

續修永定縣志

卷之十一 七古

十

撐船頭得失全憑篙在手一篙失勢手無措巨石當
衝不逾步篙師跳水力排冝以背抵舟舟立住奴子
駭顧神已癡我亦咄咄頗稱奇人生勇猛當如此殊
有中流砥柱思艱危纔脫鴨子口木龍白馬爭哮吼
險惡驚傳鬼見愁行人到此頻搔首搔首看天奈若
何人間平地有風波從來涉險仗忠信弱水蓬萊任
我過

鬼谷洞

龔經濟

天門崩劣西南隅一十六峰爭突兀周史遺塚傍崧
梁丹竈尙留赤松窟中有清溪窈且深鬼谷先生曾

此宅先生著書十四章門前乃有蘇張客道傳老君
顏如童洞裏坐擁皋比席乞兒狀貌本不凡苦心爲
衍捭闔策我來正逢春夏交榴花綴紅洞石白轉丸
祛篋尋遺踪土人不許穎川借憶昔蘇秦秘師傅朝
候秦關暮楚闕六國各各鬪龍興羣羊都驅入虎穴
連雞不飛可奈何三軍淚灑開關血億兆性命一鴻
毛富貴好憑三寸舌師承更有李丞相沙邱奇謀最
淒絕詩書陡然一炬焦百王都隨祖龍沒欲牽黃犬
出東門怎奈當年奪其魄縱人橫人何有哉猶羨七
術多奇畫君不見道州周茂叔孔顏之樂人自尋築

續修永定縣志

卷之十一 七古

十一

室濂溪惟養拙

石笋篇

陳圭

造化鍾靈何太奇變幻萬象山岩陲零陽石笋載志
乘夙昔傳聞吾心疑今懷一鐸此司訓入境便欲速
得之翹材秀士接踵至班班玉筍標風儀扶輿精英
在鬢序考校抽拔才恐遺豈有餘氣生龍骨懸巖絕
巘森森垂竭來入眼于公宅髹几簇立春林枝奪人
所好乃不恕以手摩挲難致詞晚歸急呼匠石語爲
我採取隨其時冥搜苦索經幾日攜來片石樓階墀
得隴已足况有蜀中邊大小形參差天生珍物各有

主山靈守護安能私鑱青鑿翠心力盡麤沙細石猶
磨治如金出鑛玉出璞如脫錦繡香孩兒其身正直
秀以削其膚細膩光如脂又如天梯劃層級節節上
達凌烟姿我聞堯山出文石錦章五色當堯祠烏君
山石高十丈雙萼枝葉交紛披樂史記載不及此粉
飾寰區空爾爲顛米好具衣冠拜髯蘇還叅玉版師
若令公武眼中見劊之不得空涕洟我從夢想十年
後如甘食飲人渴饑宦囊探之無長物錦罽綈帙同
陸離川效珍奇嶽修貢此意見諸班生詩至寶不合
自緘秘腐儒重襲無乃癡明堂清廟有法物籩房敦
天子照耀奕葉流光熙

續修永定縣志

卷之十一 七古

十二

盤樽鼎彝何時筍席近

伏波將軍廟懷古

覃懷遠

丈夫立功貴擇主當日風雲慶龍虎殿前聚米永衆
軍虜在目唾手取先拜隴西破零羌又平徵側開
南荒男兒要當死邊邑週甲猶作矍鑠強落日邊笳
繞霜鬢臨湘一戰熊羆勅深入不毛先武侯可憐士
疲將軍病壺頭進軍風日苦路巉水漂皆險阻奏書
妄誚是耿舒忽報將星隕南浦只今荒祠草色侵行
人悲歌武溪深暮兩靈旗風獵獵我來弔古感不禁

看甘其所苦危而後安兒心未長母心殫殉夫易撫

孤難

解二

夫在妾身輕夫死妾身重毀譽聽人不足恤

孤弗成立負者眾歷經磨折苦胡爲惟冀兒爲荀氏

龍薛家鳳豐於兒韻書嗇於自奉

解三

一燈風雨雞喔

喔深夜鳴機伴兒讀兒雖眠母未宿但喜兒勤修不

顧己勞碌身上衣裳甕中粟拮据十指間仔任一肩

獨

解四

既長延名師爲兒課讀意孜孜香稻調珠米銀

鱸膾玉絲惟先生饌必手飪之願立雪紅蘭萃爲芝

當兒隳志日正母痛心時名成十載不嫌遲僉曰母

賢有此佳兒

解五

一領青衿是發軔之先聲看鶚薦賦

續修永定縣志

卷之十一 七古

十四

鹿鳴森森寶樹田家荆萊衣能戲彩花榜定題名夫

如未死嫡猶生妾身事畢妾請行九原重相見一告

撫孤成

解六

寡鵠淒淒悲語歇啼烏啞啞返哺切寸草

心千秋節孤兒身外名慈母眼中血每一回思一痛

絕噫嘻乎恨不親捧鸞章泣奏金闕

解七

梅蘭竹柏心

風露冰霜苦陶侃孀親猷陽母大節堂堂共千古我

慚舊宰官褒旌曾無補惟歌詩取樂府琅琅錦瑟

夔鼓留作田門節孝譜

解八

登天門山放歌

羅光篔

共工一怒天柱折來觸此山山中裂女媧煉石補不

得千秋萬古留一缺天忽謫我此山間開門日日常
見山崖嶺十六峯白雲相徃還使人欲上愁躋攀今
年六月尤酷熱天風吹我度雲關初過卅六盤石棧
連層巒時墜九淵底時升九天端後人額觸前人踵
馬鬃嶺比蠶叢難再行數里山忽斷一石橫枕接兩
岸到此俯視但蒼烟悸魂動魄空塵念上有噴雲泄
霧之洞天下有砮崖轉石之狂湍掛壁枯藤蛟蛇影
夾路古木苔蘚癢躡蹬攀林依山轉巉巖歷盡反平
衍周環屏障列旁陂邐倚雲梯通絕巘巍巍天門開
晴空花雨來眾驚齊擣首方知千尋瀑布奔如雷相

傳上有天漕堰應藏昆明舊劫灰我欲因之窮高迥
黃昏到寺呼僧引僧言生斯長斯者未有人能登絕
頂我聞此語空徘徊山月照壁猿啼哀吁嗟乎以此
山之崢嶸而崔嵬胡爲竟生此地哉鍾山秣陵北天
台剡城邊太乙表咸陽峨眉鎮西川此外壺口蒙羽
嶠嶓荆岐難悉數各附冀徐梁雍名以傳安得夸娥
之力始皇鞭驅此山將洞庭填高抗祝融峯橫絕岫
巒巔豈不足與東岱西華中嵩北恆相比肩竟然拓
落域僻壤邇來四萬八千年縱有鬼谷篆文在洞渺
青谿空流泉亦有赤松修煉處峯留丹竈冷殘烟雨

雅不釋山經漏徒爲樵夫牧豎相愛憐嘆惜混沌未
闢前造化位置何太偏浩歌一曲問青天

前題□

羅福海 春帆

三閭大夫唐突問天天不顧那識天門闢此處昨夜
勅旨傳虛皇命排闥闔將余晤巍巍一穴雲中出終
古空洞無啟閉芙蓉十六森兩旁俯視羣山若奴隸
數聲長嘯徑攀緣初作蛇伏繼蟻旋曲折嶽崎登絕
頂白日如輪掛我前山靈驚客至狂呼真快事冷落
萬千年乃得子游戲豈無鬼谷洞古蹟荒唐徒鑿空
亦有赤松巖仙蹤縹緲誰相攀遊人歲歲爲香火附

續修永定縣志

卷之十一 七古

十六

會誇張無一可惟有名流爪迹存庶使奇山標砢礪
工部望岱齊魯連青蓮太華欲驚天摩詰作詩嵩山
下昌黎開雲衡嶽顛下此洞天福地虛稱耳莫不因
人名以傳此山亦費媧皇石何必待之不許一錢直
子將游歷學向禽生斯長斯宜先識不然赤縣神州
九九八十一萬計一朝若使夸娥移何地不堪容位
置聞言乃發狂奴狂焚書我欲學始皇山經爾雅都
堪毀獨著一編大書此山之奇險使與崑崙無低昂
羣仙空中噉何如暫娛樂不必服九轉丹不必駕千
年鶴卽此便可通帝座君來原聽鈞天樂我聲連應

手猶招頃刻萬壑呼風相怒號腳底瀑布蛟龍走掌
中晴雷猿狖逃蒼天益低山益高吁嗟乎人必崛起
乃英雄山必獨立乃名勝但令邱壑得表章僻壤亦
與通都並山寺鐘聲鳴復止下界沈沈明月起大告
世人且莫驚山今得名從隗始

石人打虎山

黃道讓

猛虎白日南山遊石家兄弟磨拳頭拳頭磨石石欲
穿虎兮爾與石孰堅誰知人石虎亦石夾路相逢同
一厄一人當虎首氣香於菟膽如斗一人履虎尾前
身三世泰山鬼一人欲後不後前不前似防二子戰

續修永定縣志

卷之十一 七古

十七

之不克作救援謀成三伏手共指今日其無山君矣
虎乃直前氣猶猙二子叱之風火生明知頭銅尾亦
鐵意欲一拳直透要害如紙裂人呼則山鳴谷應虎
嘯則雲頹月黑忽被罡風一吹齊不動至今虎欲回
頭不能人欲放手不可只得終古全力相向立山缺
猶幸從來生長巒荒中不作填海始皇鞭頭血安得
吾家初平術信口一叱皆起立人還人虎還虎人去
殺賊虎齧虜華山之羊何足數

望天門山作歌

徐奏鈞

朝望天門山暮望天門山山高插霄漢白雲相往還

我聞十六峰頭多奇景四時變幻非一般仙人窟宅
剩丹竈我欲從之病老孱平生游迹徧吳楚君山嶽
麓曾延佇昨來庸城依官舍胸中塵俗積斗許■林
既已遙靈谷何迢迢故鄉山色豈不好遜此奇峰突
兀千尋壁立之高標神工鬼斧費雕削想見千巖與
萬壑雲梯高挂接青冥天帚倒垂懸碧落當日壺頭
聞進軍至今千載思殊勲明珠一謗馬革裏山中惹
苒羞芳芬伏波去後少遊賢名山又見飽蠻烟金焦
鷲嶺培塿耳文人騷客徃徃歌咏而流連茲山縱然
誇崢岼誰憐生此楚疆之幽窟左隣周赧之荒墳右

續修永定縣志

卷之十一 七古

十八

傍驩兜之朽骨

崇山驩兜家及周赧王墓俱在永定縣境

摩空作鎮亦奚

爲徒令我心懷景仰生於戲朝望天門兮墓望天門
兮望望不可到安得洪崖浮邱翼我而叩閭闔以陳

詞

望天門山

慈利人 朱之材

我讀張公天門詩名山常結夢中思化人樓臺倚空
碧身雖未往神先馳半生苦被詩書束密邇林巒未
插足口依吟案事鉛槧捫胸只覺胸懷俗聞說茲山
高接天俯視塵海兜羅綿石筍參差排萬仞瀑布晴
晝吼崖巔虎嘯猿啼聲莽蕩白蝠蒼鷗互還往烟沉

古壑鎖蛟螭日冷綠蘿悽颯颯一線丹梯不可攀
灑氣橫空絕凡想豁然中開露鼓林靈泉之院窈而深
石空嵌壁更奇險鬼谷學易曾此臨況復宜都周內
史佳城鬱鬱傍山起年去年來閱幾春古人遺跡付
流水何時尋幽入梵宮秋風吹瘦七尺筇直把塵氛
撲三斗天門頂上認星紅